

# Shahidi Kanisani Daima

*Bwana alisema nanyi uso kwa uso mlimani, toka kati ya moto—Torati 5:4.*

**K**amwe Mungu hajawahi kuliacha kanisa Lake bila shahidi. Katika matukio yote ya majaribu na uthibitisho, ya upinzani na mateso katikati ya giza la kimaadili, ambalo kanisa limepitia, Mungu amekuwa na watu maalum ambao wameandaliwa kuichukua kazi Yake katika hatua tofauti na kuiendeleza mbele kwa mafanikio makubwa. Kupitia kwa wazee na manabii Alidhihirisha ukweli Wake kwa watu Wake. Yesu alikuwa mwalimu wa watu Wake wa zamani kama ambavyo alikuwa Alipokuja duniani akiwa amefunikwa kwa vazi la ubinadamu.

Akiwa ameuficha utukufu Wake katika umbo la ubinadamu, alitokea mara nyingi kwa watu Wake na kuongea nao “uso kwa uso, kama mtu asemavyo na rafiki yake.” Yeye, Kiongozi wao asiyeonekana, alijificha kwenye nguvu na wingu la moto na kuzungumza na watu Wake kwa njia ya Musa. Sauti ya Mungu ilisikiwa na manabii ambao aliwateua kwa ajili ya kazi maalum na kubeba ujumbe maalum. Aliwatuma ili kurudia maneno yale yale tena na tena. Alikuwa na ujumbe ulioandaliwa kwa ajili yao ambao haukuwa kwa njia na mapenzi ya wanadamu na ujumbe huu aliweka vinywani mwao na kuwaongoza kuusema. Aliwathibitishia kuwa Roho Mtakatifu angewapatia lugha na maneno ya kusema. Yeye aliyeujua moyo angewapatia maneno ambayo kwayo angewafikia watu...

Kamwe hakutakuwa na wakati katika historia ya kanisa ambapo mtenda kazi wa Mungu atakunja mikono yake na kutulia, akisema, “yote ni amani na salama.” Hapo ndipo ule uharibifu utakapokuja. Kila kitu kinaweza kusonga mbele katikati ya mafanikio yanapoonekana; lakini Shetani yuko macho na anajifunza na kushauriana na malaika zake waovu juu ya mbinu nyingine ya ushambuliaji ili aweze kufanikiwa. Shindano litazidi kuwa kali zaidi na zaidi katika upande wa Shetani; kwa sababu anachochewa na nguvu kutoka chini.

Kadiri kazi ya watu wa Mungu inavyosonga mbele kwa nguvu iliyotakaswa na isiyoweza kushindwa, wakipanda kiwango cha haki ya Kristo katika kanisa, wakichochea na nguvu kutoka kwenye kiti cha enzi cha Mungu, pambano kuu litazidi kuwa kali zaidi na zaidi na litakuwa bayana zaidi na zaidi. Watu watapangwa dhidi ya watu, mipango dhidi ya mipango, kanuni za asili ya mbinguni dhidi ya kanuni za Shetani. Ukweli katika awamu zake mbalimbali utapingana na makosa katika aina zake zinazobadilika-badilika, zinazoongezeka, na ambazo, ikiwezekana, zitawapotosha hata wateule.

Kazi yetu inapaswa kuwa yenye bidii. Hatupaswi kupambana kama wale wanaopigana na upepo. Huduma, mimbari na viwanda vya uchapishaji huhitaji watu kama Kalebu, ambao watafanya na kuthubutu, watu ambao macho yao yamekazwa kuutambua ukweli mbali na makosa, ambao masikio yao yamewekwa wakfu kupokea maneno toka kwa Mlinzi mwaminifu (*Testimonies to Ministers and Gospel Workers*, 404-407). Ulimwengu unahitaji ishara za ukristo wa kweli (*Testimonies to Ministers and Gospel Workers*, 416).